

Newspaper	BERITA HARIAN
Date	18 MAY 2016

PM hadiri sidang rai ASEAN-Russia

BH - 18/5/2016

Putrajaya: Datuk Seri Najib Razak, akan mengetuai delegasi Malaysia ke Sidang Kemuncak Peringatan ASEAN-Russia di Sochi, Russia mulai 19 hingga 20 Mei ini.

Wisma Putra, dalam satu kenyataan semalam, berkata Perdana Menteri akan diiringi isterinya, Datin Seri Rosmah Mansor; Menteri Luar, Datuk Seri Anifah Aman dan pegawai kanan dari pejabat Perdana Menteri dan Kementerian Luar.

Sidang Kemuncak Peringatan ASEAN-Russia dianjurkan bagi memperingati dan meraikan 20 tahun jalinan rakan dialog ASEAN-Russia, selain sebagai wadah untuk negara anggota ASEAN dan Russia merangka hala tuju masa hadapan kerjasama ASEAN dan Russia.

Bakal memperaku Deklarasi Sochi

Sepanjang sidang berlangsung, pemimpin negara anggota ASEAN dan Russia akan memperakukan Deklarasi Sochi bertajuk 'Bergerak Ke Arah Kerjasama Strategik Untuk Manfaat Bersama'.

Pemimpin negara anggota ASEAN dan Russia juga akan mengambil maklum Pelan Tindakan Komprehensif 2016-2020, yang merangkumi kaedah spesifik untuk memperkukuhkan lagi hubungan bagi tempoh lima tahun akan datang.

Ketika lawatan kerja ini juga, Perdana Menteri akan mengadakan sesi pertemuan dengan Presiden Russia, Vladimir Putin bagi membincangkan isu berkepentingan bersama.



Sidang Kemuncak Peringatan ASEAN-Russia dianjurkan bagi memperingati dan meraikan 20 tahun jalinan rakan dialog ASEAN-Russia”

Kenyataan Wisma Putra